

.../business produkcija



Nova proizvodna linija u Fabrici cementa Lukavac

Fabrika cementa Lukavac stavila je u pogon novu proizvodnu liniju, čime je kapacitet dnevne proizvodnje povećan sa dosadašnjih 1.000 na 2.000 tona. Novi proizvodni pogon obezbijedit će godišnju proizvodnju od 600.000 tona klinkera i 800.000 tona cementa. Grupa Asamer za osam godina, od kada je preuzela ovu fabriku, uložila je 110 miliona eura, a značajna pažnja poklonjena je i na ispunjavanje ekoloških standarda. Za *Business magazine* piše **Erna Jusufagić**

Puštanjem u pogon nove proizvodne linije, Fabrika cementa Lukavac postala je najveći proizvođač ovog građevinskog materijala u Bosni i Hercegovini. Sa dosadašnjih 1.000 tona dnevno, kapacitet proizvodnje je udvostručen na 2.000 tona. Sa proizvodnih traka sada će godišnje silaziti 600.000 tona klinkera i 800.000 tona cementa. Uprkos recesiji koja je zahvatila cijeli svijet, izgradnja je završena prema postavljenom planu. Izgradnja novog pogona trajala je 15 mjeseci i završena je bez zastoja.

“Prilikom privatizacije zacrtali smo tri cilja: da proizvodimo dovoljno cementa, sačuvamo radna mjesta i zaštitimo okoliš. Sva tri cilja smo ispunili”, kaže Kurt Asamer, suvlasnik i predsjednik Nadzornog odbora FCL.

Zelena tvornica

Vrijednost radova je 80 miliona KM, a ukupne investicije austrijske Asamer grupe Gmuden-Ohlsdorf u Fabriku cementa Lukavac, od preuzimanja 2001. godine, prešle su iznos od 200 miliona KM. Podignuta je kompletna linija za proizvodnju klinkera sa cjelovitim tehnološkim kompleksima i građevinskim objektima, te transportnim linijama toka materijala. Tvornica je dobila nove skladišne silose sirovinskog materijala, vertikalni mlin

Osim što sa novom linijom postaje najveći proizvođač ovog građevinskog materijala u BiH, lukavačka tvornica postala je jedna od tri tehnološki najmodernije cementare u Evropi

za mljevenje, homosilos, petostepeni izmjenjivač toplote, peć, hladnjak klinkera, te liniju za otprašivanje mlina i peći sa ugrađenim vrećastim filterima. Izgradnja nove tehnološke linije zahtijevala je složen i obiman posao. Ukupno je ugrađeno 11.500 tona betona, proizvedenog vlastitim cementom. Od ukupno ugrađenih 5.700 tona čelika i opreme, 3.900 tona proizvele su i ugradile domaće kompanije. Sigurnost gradilišta bio je prioritet investitora prilikom izgradnje svih faza nove proizvodne linije. Važno je istaknuti da se tokom izvođenja složenih i obimnih radova nije dogodila ni jedna nesreća ili povreda radnika sa težim posljedicama, tvrde u lukavačkoj cementari.

“Recesija neće uticati na poziciju Fabrike cementa Lukavac i obim proizvodnje u fabrici, jer ovo je kapacitet koji je projektiran da radi tri decenije, a ne nekoliko godina”, kaže Asamer.

Iako je građevinarstvo privredna grana najteže pogođena krizom, Asamer ne sumnja u veće probleme sa plasmanom proizvoda.

“Možda je plasman trenutno smanjen za otprilike 15 posto, a padova bi moglo biti još. No, mi ovdje investiramo u fabriku koja će raditi najmanje 30 godina, tako da se ne bojimo krize. Ovo je perfektno postavljena firma na perfektnoj lokaciji. Mi ćemo i narednih godina raditi punim kapacitetom, čime ćemo zadržati sva radna mjesta”, poručio je Asamer.

Osim što sa novom linijom postaje najveći proizvođač ovog građevinskog materijala u BiH, lukavačka tvornica postala je jedna od tri tehnološki najmodernije cementare u Evropi. Tome svjedoči i izuzetno važna činjenica - ugradnja 33 vrećasta filtera koji otprašuju tek minimalnih 10 mg po kubnom metru zraka. To je čak pet puta manje od strogih ekoloških propisa EU. Radi ilustracije ekološke učinkovitosti nove proizvodne linije, standardi u bivšoj državi dozvoljavali su ispuštanje čak 200 miligrama čvrstih čestica u kubni metar zraka.

“Ponosni smo onim što smo postigli modernizacijom i u ekološkom smislu”, ističe Asamer.

Asamer Fabrika u Lukavcu među stručnjacima već je dobila nadimak Zelena tvornica cementa.

“Ova tvornica sada je toliko ekološki pouzdana i čista da je bez straha možemo smjestiti u centar bilo kojeg grada”, ističe sa ponosom Izet Imamović, direktor Fabrike ce-



Jedna od tri tehnološki najmodernije cementare u Evropi



.../business produkcija



Biznis i dobrobit za zajednicu u ekološki zdravom okruženju

menta Lukavac.

Fabrika cementa Lukavac kao sirovinu za proizvodnju cementa koristi pepeo iz Termoelektrane Tuzla, čime je emisija pepela sa odlagališta u atmosferu znatno smanjena. Ovo je još jedan pozitivan ekološki detalj.

Još jedna izvanredna strana ove investicije je značajno angažiranje i učešće domaćih kompanija. Angažiranost lokalnih firmi u ovoj fazi izgradnje fabrike doprinosi razvoju lokalnih kompanija, napretku privrede ove regije i ukupne bh. ekonomije. U realizaciji ove druge velike investicijske faze učestvovalo je 120 kompanija kao isporučioци i izvođači radova. Vlasnici Cementare ističu izuzetan doprinos čak 66 bosanskohercegovačkih firmi, koje su svoj posao odradile profesionalno, kvalitetno i na vrijeme. Odlične poslove ovdje obavili su Remont montaža iz Tuzle, Širbegović iz

Gračanice, FGO iz Banovića, Fakomel iz Lukavca, Butmir iz Sarajeva i mnoge druge. Na ovim poslovima domaće firme inkasirale su oko 25 miliona konvertibilnih maraka. Prema riječima člana Upravnog odbora FCL Karola Podora, kompanija Asamer kupila je kamenolom u Doboju radi sigurnosti u dobavljanju sirovina, jer je Kamenolom vijenac, koji sada daje sirovinu i za Fabriku sode, prilično nesiguran dobavljač. Oni su zainteresirani za kupovinu i rekonstrukciju Vijenca i sada su u fazi proučavanja dokumentacije ovoga preduzeća.

Uspješna privatizacija

Novi kapaciteti postaju i veći potrošač struje, domaćeg uglja, krečnjaka, angažirat će se više transportnih vozila. Od svega, naravno, višestruke materijalne koristi imat će tuzlanska regija i ukupna bosanskohercegovačka ekonomija.

“U Bosni i Hercegovini, a posebno u Tuzlanskom kantonu, naišli smo na dobrog partnera za provođenje naših poslovnih aktivnosti. Veoma smo zadovoljni uspjesima koje ostvaruje Fabrika cementa Lukavac, a dosadašnje rezultate možemo usporediti sa onima koje ostvarujemo u drugim evropskim zemljama”, ističe Asamer.

Nekad turobnim kompleksom cementare smještene na rubu grada, sa dimnjacima iz kojih kulja dim i prašina, danas dominiraju travnjaci, modro-zelene krošnje drveća, čempresi i zasadi ruža. Biznis i dobrobit za zajednicu u ekološki zdravom okruženju, to je poslovna filozofija vlasnika Fabrike cementa u Lukavcu, od kada su preuzeli tvornicu u tzv. velikoj privatizaciji. I jedna od rijetkih uspješnih priča o privatizaciji u Bosni i Hercegovini. Lukavačka fabrika dobitnik je priznanja Agencije za promociju stranih investicija (FIPA) za najveću *green field* investiciju u našoj zemlji u 2008. godini. Puštanjem u puni pogon, značajno će se smanjiti uvozna ovisnost Bosne i Hercegovine o cementu.

Uvoz ovog građevinskog materijala iz Mađarske i Hrvatske smanjit će se sa sadašnjih više od 30, na svega 10 posto ovisnosti bh. tržišta od uvoznog cementa. **B**

Prosječna plaća 1.200 KM

Asamer Holding AG je 99 postotni vlasnik Fabrike cementa Lukavac. Ova austrijska porodična firma specijalizirana je za proizvodnju betona, cementa, šljunka, kamena, te za recikliranje, obradu mineralnih sirovina, turizam i nekretnine. Sa 5.000 zaposlenih na 150 lokacija, u 19 zemalja svijeta, kompanija Gmunden iz Ohlsdorfa svakog radnog dana transportira i proizvodi 125.000 tona betona, cementa, šljunka i kamena. Transporte obavlja vlastita flota kompanije od 500 kamiona. U Fabrici cementa Lukavac zaposleno je 220 radnika, čija je prosječna plaća 1.200 KM.